

盛京通志

自卷四十七至
卷四十八終

| | | |
|------|-----|------|
| 內閣文庫 | | |
| 函 | 冊 | 號 |
| 二四一 | 六九二 | 三九六九 |
| 架 | 冊 | 號 |
| | | 漢書類 |

| | | |
|------|-----|------|
| 內閣文庫 | | |
| 函 | 冊 | 號 |
| 二九一 | 六九二 | 三九六九 |
| 架 | 冊 | 號 |
| | | 漢書類 |

(四二九)

| | | |
|------|---------|------|
| 內閣文庫 | | |
| 番號 | 漢 | 3969 |
| 冊數 | 692(24) | |
| 函號 | 291 | 97 |



盛京通志卷之四十七

藝文

淺草文庫

詩

四言

明

曾公祠

盧瓊

維帝御極柔遠能邇一夫不獲痾瘵是似蠢茲遼人不戢自焚公憫冥頑任禍於身敷奏祈宥脅從罔究帝曰俞哉銑拜稽首渠魁以殲衆感以祐保茲東土如翼如覆帝曰都哉陟茲功懋銑拜稽首天子萬壽

農不易業市不易肆以生以育維公之賜維罔有柏
維麓有砥繩之鑿之維公之祠公惟信宿留公之似
我其夙夜罔不敬止匪我思之子子孫孫匪民私之
既浹且淪匪公之惠惟帝之仁遼其莫安於萬斯春

五言古

金

漉酒圖

龐鑄

我愛陶淵明愛酒不愛官彈琴但寓意把酒聊開顏
自得酒中趣豈問頭上冠誰作漉酒圖清風起毫端
露電出形似神情想高閒大似揮絃時目送飛鴻難
袖中有東籬開卷見南山嗟予因塵土青鬢時時班
折腰尚未免敢謂善閉關望望孤雲翔徒羨飛鳥還
歸田未有日掩卷空長歎

元

送周山人之遼東

揭傒斯

物變風已暄庭虛雪猶在每與君子違偏驚歲年改
名山先夢到靈藥隨方采明日望行人雲槎隔遼海

次韻黃華和同年九日詩

耶律楚材

西風殘日秋有客嗟幽獨偶爾得香醪凄然憶霜菊
世態屢變遷人生多反覆十年一夢中猶未黃梁熟

明

由祖越過龍泉

御史程啓克

一逕何盤曲東西亦委蛇危巖嵌蘭若疲馬安能馳
豈不憚峻險薄言恣探奇清泉濯長纓聊與性命期
雅有杯中物可以樂我私

本朝

恭謁

福陵

府尹廖騰燧

貞元五百期乾坤啓

真主祥開遼海東龍蟠與鳳舞

聖人肇丕基智勇邁千古朔業垂我

皇

聖德溯

神祖拯民塗炭中功德超三五用人與行政釐然綱目舉以

此順天人萬方歸版宇小臣謏劣材奉

命尹茲土朔望叩

崇陵靈爽恍如覩海嶽映堦堦日星輝廊廡鬱鬱氣佳哉卜

年難具數

恭謁

昭陵

府尹廖騰燧

太祖真神武

文皇聖繼之聖神欽作述

二陵遙相依石馬臨青巘龍樓拱翠微駕祁還軼妣史冊勲
華垂五雲在天表拜舞肅朝儀

禱雨

府尹 廖騰燿

奉天發祥地年年雨澤渥我啣

帝命來旱魃偏爲虐豈以政刑乖故教火雲爍中夜靜省
愆虔誠叩冥漠有罪譴微躬老羸免溝壑願天監茲
沈甘霖沛村落

喜雨

府尹 廖騰燿

築壇告天地三日不得雨憂心正如焚石燕忽飛舞
大雨沛連朝汪洋滋沃土人言感應理不誣我謂斯
言亦近諛布茲惠澤安農夫天心原自愛 留都

遊千山登瓔珞觀

御史 郝浴

照海一千峰參差如潑翠我行一玩心敢謂養神智
煙霞入衣裙庶用清寤寐瞥看雲生處翻身若摩翅
斯須歛其間乃是高明位精廬架九霄天可揖而至
不怪掛瓢人憑將軒冕棄推窗遠岫來一一如擁篲
青靄諸峰和白飛萬壑肆猶記客秋來紅紫紛如醉
霜風日夕生蕭然本色出歷落見茅庵髣髴開十地

琅琅梵聲發謾謾松濤沸世道在神州悠然興遠思
得無有救拯巨細爭一臂常恐遮人倫於此成遜避
泉壑雖幽暇安忍極深邃寄語愛山人斯言不無意

羅漢洞

御史郝浴

松雲攢護間杳然得翁受拄杖看巖額中有尊者某
應是愛飛行當翠鑿戶牖深入幽轉明一氣通前後
最後結窓櫺下窺萬壑陡日輪漸南來不吞已到口
就中諸聖僧屈指各二九嗔笑皆慈悲雖怪不爲醜
拂塵起摩索始信仁者壽松聲入耳根胸中渾刷垢
愛此清涼居薰風自爲帚抖搜出前巖再坐洞門右

仰視簷石掀怒出壓雲母既壓而復翹俯仰盡諸有
五老立階下純用大夫守左壁擁高隣蒼茫以背負
萬松多於毛碧青那可數一松一精舍一石一春曰
雲來石如雪雲去松如綬真可作覺林而爲菩薩藪
明月的的來何苦紅塵走若解作巢由愈令稷契厚
齋戒發經囊薰修看耆耆卽不出一言亦自有真趣
紫翠罩羣峰風月恣汝取可惜好巖壑著處蟠蚪蚪
一抹白雲封經年無人扣

金剛峰

御史郝浴

林麓穿不徹都爲蒼潤封線天當路豁滿插青芙蓉

高華無與極云是金剛峰低徊禮其足啣山日已春
來朝把名香追尋智者踪踈踏瓔珞下雙手一當胸
萬峰爭秀發一鶴下青松偶睨金剛巔渠反跂而顛
伸手頂可摩委如抱足龍乃知此間大衝突盡包容
區區一拳石不足問倨恭人天有巨眼無爲金剛壅

雜詩

李經

造物開巖地巖帳揜劍壁苔花張古錦霜苦老秋碧
日夕雲竇陰風鼓泉湧石馬蹄忌磽确樵道生枳棘
盤盤出井底迴首悵如失長老不耐事底事挂塵迹
披雲出山椒白鳥表林隙

祖越寺至羅漢洞

山頂有
無梁觀

府丞 呂履恒

空山寂無聲鐘磬自生響宛轉松石間忽來雲鳥上
筋骨未遑安耳目已豁朗巖腹正中穿出入隨俯仰
混沌誰開鑿玲瓏非意想仰視縹緲峰天表撐一掌
其上有飛觀安能度表廣自非餐霞人邈然不可往

留別多士

府丞 楊汝毅

視學八閩月承

命陟匪司既共同官別還與多士辭 留都稱首善文教
比豐岐俯念寒峻苦搜羅靡敢遺疑義思與析正始
思與追所憾爲日淺惠澤殊未施何當謬推許嘖嘖

傳口碑擁道情繼綵溽暑遠驅馳無以酬雅意一言
贈將離諸子皆英俊堪作梁棟資前賢惜寸陰努力
少壯時中虛斯受益積善乃福基來歲秋風高振翮
入雲遶勉旃各自愛千古以爲期

晚入輝山過蓮花泊月夜登向陽寺

福璐

落日散殘紅拂面晚風爽衆鳥各飛還幽人偶獨往
緣溪跨石橋莎岍平如掌迤邐過古城嵐氣漸沉碭
樵逕屢降升怪樹或俯仰巖花綴露馨石髮經秋長
迂迴絕澗遙婉變脩林廣舉足方嶮嶮轉瞬忽康崑
遽廬暮靄封峭壁飛泉響悠揚梵貝清突兀軒楹敞
探蹟寧辭勞扶筇觀月上羣峰各歛雲劃天河漢朗
指顧捫斗牛咳唾驚魍魎溟海托元氣磅礴供奇賞
調調天籟發飄飄羽化想仙路知可尋揮手謝塵網

七言古

金

田器之燕子圖

并序

龐鑄

器之自敘云明昌丙辰予從軍塞外野舍荒涼難以
狀言春未有雙燕亦巢此屋土人不之識屢欲捕之
予曲爲全護此燕晝出夜歸予必開戶待之忽一日

飛止坐隅都無驚畏巧語移時不去予始悟明日秋社此鳥當歸殆留別語也因作一詩贈之云幾年塞外歷崎危誰謂烏衣亦此飛朝向蘆陂知有爲莫投茅舍重相倚君憐我處頻迎語我憶君時不掩屏明日西風悲鼓角君應先去我何歸此詩以細字寫之爲蠟丸繫之燕足上明年四月予受代歸又八年泰和甲子任潞州觀察判官四月十二日偶坐解舍之含翠堂忽雙燕至一飛簷戶間一上視屏予諦視之繫足蠟丸故在乃知此鳥蓋往年贈詩者也因請同年龐君才卿書爲圖求諸公賦詩

田君才畧燕雲客少年累有安邊策悔從筆硯取功名直要橫馳沙漠北塞垣春雪白皚皚東風未放元陰開烏衣之國定何許一雙燕子能飛來三年驛舍安西道眼底鶯花無夢到忽見低飛入短簷此身似向邯鄲覺君居海東我中原相逢乃在穹廬前天涯流落俱爲客感時念遠空潛然長安何限高高閣書夜風閒開翠幕底事猜嫌不往依甘從此地風沙惡土人嗜肉無人心一生弋獵誇從禽有巢幸穩勿浪出汝身未必輕千金朝來莫去益狎昵物我相忘情意一但恠重裘積漸添元是西風催社日須知音巧

惟鷓鴣忽來坐隅如告辭我方流寓未歸得爲君忍
賦傷心詩詩成自述聊爲戲繫足封之亦無意燕已
歸飛我未歸刁斗聲中忽驚歲旄頭夜落妖氛收嫖
姚獻凱歸神州玉關早喜班超入北海不聞蘇武留
君才經世寧終枉幕府須賢來上黨別後歸期兩及
瓜人間秋燕十來往沈沈官舍紅芳稀葛衣燕居澹
忘機忽聞巧語入簷戶大似相識來相依一飛簷外
窺庭樹一上屏山驚不去解足分明得帛書真是當
年留別句天生萬物禽最微固耶偶耶吾不知古道
益遠交情醜朝恩莫怨雲遷移當時握手悲別離一

旦富貴棄如遺聞予燕歌應自疑慎無示之嗔我譏

雪谷曉裝圖

龐鑄

溪流咽咽山昏昏前山後山同一雲天公談笑玉雪
噴散爲花蕊白紛紛詩翁瘦馬之何許忍凍吟詩太
清苦老奴寒縮私自語作奴莫比詩奴苦木僵石老
鳥不飛山路益深詩益奇老奴忍嘆憐翁癡不知嗜
好乃爾爲楊侯胸中富邱壑醉裡筆端驅雪落因何
不把此詩翁畫向草堂深處著

醫巫閭山

太常寺丞 蔡珪

幽州鎮山高且雄倚天萬仞蟠天東祖龍驅之不肯

去至今鞭血餘殷紅崩岬暗谷森雲樹蕭寺門橫入
山路誰道營邱筆有神只得峰巒兩三處我方萬里
來天涯陂陀繚繞間風沙直教眼界增明秀好是嵐
光日夕佳

元

金太子允恭墨竹

劉因

黑龍江頭氣鬱蔥武元射龍江水中江聲怒號久不
瀉破墨揮灑餘神功天人與竹皆真龍墨竹以來凡
馬空人間只有墨君堂何曾夢到瓊華宮瑤光樓前
月如練倒影自有河山雄金源大定始全盛時以漢
文當世宗興陵爲父明昌子樂事孰與東宮同文采
不隨焦土盡風節直與幽蘭崇百年圖籍有蕭相一
代英雄誰蔡公策書紛紛少顏色空山夜哭遺山翁
我亦飄零感白髮哀歌對此吟雙蓬秋聲蕭蕭來晚
風極日海角天無窮

題王學士熊岳圖

元好問

洗參池水甜於蜜玉堂仙翁髮如漆膝前文度夏風
流盡卷風流入詩筆長松手種欲摩天海岳樓空落
照邊古來說有遼東鶴仙語星星誰爲傳五百年間
異人出却將錦繡裏山川

本朝

泛舟鴛鴦湖

左昕生

青春威遲碧草芳
冰開湖水泛鴛鴦
黯黯春流波上下
羈緒與之俱短長
同人載酒向湖畔
更放鷁舟遊汗漫
棹發參差菱荇分
人語低昂鳧鴨亂
洪濤出沒巨流通
扁舟明滅夕陽東
萬頃茫茫光靄霽
千山倒影氣鴻濛
傍舟大魚有時出
驚波跳沫聲沸澤
鱸鮪風雲久不興
蛟龍咫尺愁相失
座上久客蘆中人
迴船悄然動呻吟
不知楊柳西園盛
爭如芙蓉南浦深
南浦芙蓉風歷亂
酒酣興極淚如霰
空餘鷗鷺對浮沉
湖上鴛鴦終不見

杏山行

侍郎

宗室塞爾赫

杏山山上石岬嶮
杏山山下水漻泐
山前山後土猶紅
疑是當年覆軍血
憶昔將軍未上馬
羽檄交馳遍天下
衆號百萬出關來
遮日旌旗滿原野
畫鼓三通不交戰
虜策聲中轍先亂
二千鐵騎儼天人大
劍長弓一當萬霜摧
敗葉草偃風血流
染海波濤紅馬上
不誅長平卒只今
竹帛褒元功吁嗟
推轂竟何補虜將
解縛拜

聖主有人東望尚招魂
衣冠哭塋燕山土

五言律

金

喜夏

龐鑄

小暑不足畏深居如退藏青奴初薦枕黃嬾亦升堂
鳥語竹陰密雨聲荷葉香晚涼無一事步履到西廂

明

廣寧懷古

御史 劉成德

衰草閒仙洞清雲冷誓臺輿圖連朔野雞犬靜塵埃
水自荒沙出山從故國來戍樓鐘報曉笳鼓遞相催

遊中會寺

修撰 龔用卿

寺遠山僧少叢林草徑深懸崖盤石磴古殿度雲岑
枝密迴流合巖幽向日明陰欲將金印瀟灑定禪心

其二

蛇山盤古折綫路繞千尋萬里風雲壯諸天歲月深
花香浮塔院霞影落邱岑杳杳鐘聲動遙岑擁碧林

溫泉

副使 徐景嵩

萬古溫泉水百年幾度遊炎流從地發暖氣欲天浮
風過亭臺爽山環景物幽白憐多病客不是濯纓儔

本朝

觀海

府尹 梁拱宸

平生觀海志此日遂登臨氣象涵天地波濤撼古今
潮翻迷遠嶼日落見遙岑幸得儲舟楫能無利濟心
又
夙志懷觀海今來渤海涯長風千里浪曉日萬山霞
島影侵鼉窟潮聲捲岬沙朝宗涵地澤王氣拱

天家

登醫巫閭山

府丞 張鼎彝

北鎮名山麓嵯峨錦水東遙分長白秀直并秦華雄
日麗羣峰色松吟萬壑風從容勤杖屐勝概正無窮
蒞任祈雨甘霖大沛

錦州知府 孫成

敢曰隨車雨偶然相值中羣生兼沐浴大氣屬空濛
亦覺人情喜懸知歲事豐我來應有責詎可冒天功

宿杏花寺

錦州知府 孫成

一徑穿山入疎鐘亦漸聞門迎千嶂色寺繞幾峰雲
谷葉吹風亂巖花笑日曛老僧耽寂靜似怪客紛紜

觀音洞

鐵嶺知縣 胡蘗嬰

山骨知誰鑿儼然成小堂雲涵蒼壁潤蘚覆古苔香
淨遠龍蛇氣深通日月光穴空懸石髓斑駁盡文章
其二

洞口人煙渺空濛翠欲浮草春無鹿跡礪古有雲流

晴日巖常暗鳴禽樹自幽桃花深谷發漁者未容求

遊觀音閣

廣寧知縣 項蕙

乘輿歷危巔上方樓閣連四圍山斷絕一徑鳥飛懸

覽勝猶疑夢憑虛別有天武陵津問後此地鑿何年

牛莊迎

駕恭紀二首

海城知縣 鄭縉

忽報

鑾輿到朝衣出郭東馬蹄如捲浪人耳但聞風水草連

碧旌旗匝地紅

至尊方校獵鵠立夕陽中

野曠千官靜塵高萬馬來夔龍依日月虎兕疾風雷

柳散緹城合燈攢帳殿開歡聲騰父老共觀

帝車回

溪上大士庵寓目

御史 郝浴

漁穿楊柳渡馬散白雲洲一掌飛龍地千頭飯雪牛

磬潮天外雨虹入禁中樓冉冉青山下何人報酒籌

其二

落日雲山紫鐘聲滿

帝鄉香傳鸚鵡偈鳥叫妙莊王草屨分蒼翠金波上渺茫

自憐蕭索後不減舊來狂

同王無煩李吉津遊石氏祇園 御史 郝 浴

祇是開懷好迷愁誰復禁同緣青草去各放白雲心
十里將軍樹一丸長者金纖塵飛不到清切動高吟

其二

側身雙樹入花氣沅衣裳不道千年雪融成百合香
鮮紅嬌小築舊翠濕迴廊尚有巢居燕呢喃問覺王

其三

金谷分明在相看作化城青山如假寐飛鳥乍虛鳴
花燦陽春笑松流大壑聲到來誰復憾况是尾龍行

其四

細柳浸天碧森森一徑開憑風聞鳥喚把臂出林來
日麗元龍氣春燈惠遠材何期他化裏步步到蓬萊

暮春偕友過銀州酒壚感舊 并序 郝 浴

癸丑季春廿九同秦維紫左宏甫酌酒銀州之
市醉歸草閣忽憶剩人在日愚與陳心簡夜宿
奉天普濟院看月吟詩至四更不寐是年乙未
距今十有九年矣時寺僧厭其惡聲聞羣犬夜
吠皆噓為狂比剩公順世心簡以人言怒我不
得復有昔日之歡乃此夜得陶然與二子相對
蘇門之嘯山陽之哭於此兼之矣

無復韓公子壚頭倚二豪團圓猶手足落拓自風騷
入夏山花晚當杯夜語高尚疑燈影外髣髴落霜毫
其二

灑灑從吾好悠悠寄此身顛狂或拜石薄劣敢投綸
鳥散花樓寂塵飛海市新杞憂三萬里何許問迷津

其三

一自吟風後源源說剩人酒籌侵世界屋角挂星辰
燭剪銀州夜荷搖鷺水濱故鄉應此是何必憶纒尊
其四

漢沛今遼左神州再有年循良京縣滿雨露

帝家偏玉陛崇三事龍荒受一廛深維鑿坏意終恐負前賢

白千山至雙峰寺

陳學海

寂寂雙峰寺門開石壁間花垂紅簾簌峰疊碧孱顏
古木隨僧老孤雲帶鶴還世塵不到處勝地得躋攀

大孤山

平郡王

五嶽標名人孤山壯塞垣林巒千木直雲漢一峰尊
芳草兼秋色晴雲帶雨痕漫言題記失應向越中論
留別同學

胡文燦

到此成何事空慚歸去來幾年容我拙他日美君才

白髮奚堪數青芝好自培遲遲吾行也攬袂各徘徊
山郊

吳泰同

羸馬東郊北孤村復水灣碧開紅葉樹青破白雲山
細果荒籬熟空原晚日閒誰知風景好終日在柴關
七言律

元

和非熊韻

耶律楚材

藹藹英聲鎮北州非熊人物本風流時逢佳客開青
眼久領元戎尚黑頭已發豐城神劍出休嗟暗室夜
光投驅兵經略關中了題遍長安舊酒樓

和薛伯通韻

耶律楚材

滴滴秋光溢遠山穹廬寥落酒瓶乾詩章平淡思居
易禪理縱橫憶道安不忿西風霜葉脫難禁秋雨菊
花殘閭山舊隱天涯遠夢裡思歸夢亦難

和移刺子春見寄

耶律楚材

邂逅沙城識子初天山風雪醉吟餘文章光焰君堪
羨節操儀刑我不如麴蘖鄉中前進士風波堆裏老
中書他年歸去無相弃同到閭山舊隱居

寄景賢

耶律楚材

人間聚散忘悲歡何似林泉遜世閑十載殘軀遊瀚

海積年歸夢遶閩山空崑猿鶴招予往滿駕琴書伴
我還多謝龍岡憐老隱新詩酬酢路無慳

和冲霄韻

耶律楚材

星星華髮鏡中驚好賦歸歎接浙行重位寧貪高一
品故園無憚遠千程晴天花絡春山色落日松和秋
水聲無恙閩峰三百寺遨遊吟嘯老餘生

思親 二首

耶律楚材

老母琴書老自娛吾山側近結蘧廬髻邊尚結辟兵
髮篋內猶存教子書幼穉已能學土梗老兒猶未憶
鱸魚誰知萬里思歸夢夜夜隨風到故居

又

昔年不肯卧茅廬贏得飄蕭兩髻踈醉裏莫知身似
蝶夢中不覺我爲魚故園屈指八千里老母行年六
十餘何日挂冠辭富貴少林佳處卜新居

繼武善夫韻

耶律楚材

老子年來酷愛閑不堪白髮映蒼顏十年興廢悲歌
裏半世干戈寤寐間北闕欲辭新鳳閣東州元有舊
閩山熊經鳥引聊終歲崑下疎松正好攀

明

宿大安有懷

給事中

吳希孟

奇石蒼松世界分
千山虎豹散狼羣
洞前黑白萬林
雨壇上浮沉一篆
芸鐘盡漏隨莊室
蝶心依神會栢
臺雲清樽舊約逾
三月何日叅軍細
論文

讀書

賀欽

清晨起坐小茅堂
萬事無關一炷香
展卷細觀前聖
奧馳名敢學世人狂
也知老病年光促
爭奈詩書意味長
但願桑榆粗有得
肯隨流俗嘆斜陽

和瀋陽守愚邱先生韻

賀欽

聲利沉疴幸已瘳
烟霞痼疾豈須憂
非關避世矜高節
自是匡時乏遠猷
鎖關兩年空竊祿
雲山十載免包羞
管寧本是遼東客
不願重過五鳳樓

古澄丁聲遠來訪賦一律見遺因和

賀欽

太學陳東天下知
抗章不怕忤當時
折腰彭澤成何事
回首閩山有所思
軒外孤松全晚節
宅邊五柳散春絲
歸來還是忘機客
傳語沙鷗莫浪疑

再和瀋陽守愚先生韻

賀欽

白雲堆裏得安身
名利無干遠世塵
靜把簡編窺往哲
每將菽水奉慈親
江山秀麗時懷壯
窗戶清幽琴調新
幸有此般閒快樂
任他人醉五陵春

過蓋州

巡撫馬文升

煙霧新消海國邊
荒原寒水與雲連
山光杳靄飛鳧外
秋色參差落雁前
田野歡呼瞻使節
公庭空寂長苔錢
從容事畢還朝日
韶舞聲中覲九天

望京樓

御史郭登庸

雨洗沙場兵氣收
天涯秋暮獨登樓
四方煙井聽雞犬
百里晴郊散馬牛
斷壠黃雲依古戍
孤城斜日射寒流
滄溟寂寞魚龍伏
回首西南望帝州

祖越寺

少卿徐文華

雲煙迴合水潺湲
路轉陂陀百折還
上界鐘聲霄漢杳
前山塢影夕陽間
松濤漲壑千巖響
花雨浮空滿地斑
坐久虛堂疑誤入
恍然身世出人寰

本朝

留都城

御史郝浴

濯濯新城十二樓

天家新作

帝王州

一陵曉度燕支色
八彩晴搖鴨綠洲
風靜不聞歸鴈叫
山高時動旅人謳
只今碧落清如許
正好商霖灑玉溝

寧遠

御史郝浴

五色屏風抱九天密排粉堞萬峰連山頭帶雪穿三
箭海底迴瀾落一鞭遮莫兵從龍氣變空傳人比太
行豎夜深畫角澄千慮孤對禪燈似月圓

贈清峰寺僧遊五臺回

釋剎人

曾向金剛窟裏回芒鞋盡帶劫餘灰王侯共備香花
供龍象爭傳衣鉢來自有模形留積雪仍將消息問
春梅從今擊破琉璃盞滿目青山即五臺

晚登遼海亭

高士談

登臨酒面灑清風竟日憑欄興未窮殘雪樓臺山向
背夕陽城郭水西東客情到處身如寄別恨他時夢
可通自嘆不如華表鶴故鄉常在白雲中

龍德宮

劉仲尹

碧拱朱甍面面開翠雲稠疊鎖崔嵬連昌庭檻渾栽
竹罨畫谿山半是梅藻井香銷塵化網銅欄秋澁雨
留苔只應千古華清月狼藉春風媿露臺

浴金湯溫泉

府丞姜希轍

首山山下水涓涓煖氣翻騰珠露圓日護輕寒溫室
樹雲飛廣漠華清泉畫欄時遶靈川色碧瓦平浮玉
井煙披滌塵襟清客况春風已覺沐恩偏

壽苗焦冥

并序

姜希轍

焦冥昌平州人州有軍都山漢盧植高隱處焦冥以諸生避世為方外士居三官廟老而讀書不輟

漢庭高隱在軍都子幹流風未有殊汗漫黃冠遊帝里編摩青簡重吾儒心存虛室恒知白手穩驪龍欲探珠坐卧松風忘甲子月明鶴唳響笙竽

將至奉天雪霽

府丞 張鼎彝

春寒匝月逐行旌歷盡邊霜近

帝城昨夜雪凝丹鳳隱今朝日麗紫雲晴遙瞻王氣連三期生鳥欲起人文並兩京料得兔兎成化後豐鎬樸棧應

北鎮祠

府丞 張鼎彝

荒臺碧草映階垂華表猶存北鎮祠禮肇虞廷齊岱嶽煙迷海日暗龍螭青松蔭老千年樹白石苔深歷代碑已飭明禋馨俎豆何時輪奐肅壇壝

登祖越寺

府丞 張鼎彝

古刹環羅嶂幾重簷前恰對貴人峰煙岑歷亂迎朝旭鳥語喧闐雜壑松拳石孤懸開極始振衣直欲問山宗林巒處處饒幽勝安得探奇徧策筇

觀音洞

錦州知府 孫成

林麓蒙茸徑轉深青山偏自解招尋石塘無地留松
影洞水涵雲浣客心秋色漸高蒼靄散翠微平對暮
煙沉流連徙倚頻移席何日還期一再臨

廣濟寺塔

錦州通判 朱夢熊

卓立浮屠靄夕暉諸天景物望中微
憑陵幾見川原改剝落頻經劫火飛
雨散天花衣欲濕光含舍利鳥知皈
寄言華表峰頭鶴城郭人民是與非

連雲島望海

蓋平知縣 駱雲

水勢西從碣石來雲山沙磧重徘徊
龍門雨洗刀兵後鰲背風翻星斗回
民瘠未收珍府利官憂空作委輸裁
子期何在留岑寂疑有琴聲響石臺

謁北鎮廟

廣寧知縣 項蕙

山靈無恙氣氤氳古廟松楸宿白雲
斷碣猶存梁父禪劫灰難認嶧山文
不辭登眺尋僧話尚有林巒待鹿羣
感慨相傳思往事悲鳴雲際雁紛紛

廣寧道中望醫巫閭山

錦州府教授 張樾

遙望醫閭天際峰青山疊疊白雲濃
背連沙磧岡陵遠面對蓬瀛煙霧重

王氣氤氳躔

北極神靈縹緲憶虞封登臨定可開心目一覽

皇都大幹龍

恭紀

御製北鎮廟碑文鐫成

府尹 廖騰燧

危峰天際鬱嵯峨長白遙分淑氣多勢壯東京齊岱
嶽光聯北極帶遼河明禋禮舉神為格翰墨香浮

帝作歌虞典封山今再見蛟龍長護此巖阿

過閭山

大成

朱垣碧瓦構龍崗典繼重華史冊光雲擁朱宮藏

睿翰天開寶障莫遼疆千村煙樹登樓盡萬仞晴峰削劍
長不為文章思報國同留十日住山房

遼陽歸途曉發

吳泰同

渾水羣山望不孤迎眸淑景入歸途暖融春岍滄波
潤曙淺煙城碧柳初北極風雲開

帝關

二陵日月麗

神都桑麻今樂雍熙世締造當年盡

睿圖

五言排律

元

和張敏之詩七十韻 并序

耶律楚材

敏之學士遠寄新詩七十韻捧讀之餘續貂以
尾聊資一笑

壯年多軼軻晚節歎行藏故國顏綱穢新朝明德香
雄材能預算大畧固難量迭出神兵速無敵我武揚
本圖服叛逆何止剪濤張西討窮於闕東征過樂浪
慧侵天壘壁光動太白鉞整整車徒盛鱗鱗旗鼓望
天皇深責重賢帥廟謀臧江左將禽楚河陽已滅商
英雄皆入彀強禦敢跳梁採訪軒車闕司農官吏忙
輕徭常力足薄賦不財傷勲業超秦漢規模邁帝王
流言無管蔡奇計有平良增葺新文物耕耘古戰場

蛟龍方奮迅鵬鸞得翱翔偶遇風雲會爭依日月光
永疇千古恥一怒四夷攘虎帳十年夢龍庭幾度霜
迎降初請命出郭遠相將久敵真宜死寬恩何敢當
赦書民有幸歌詠壽無疆扶杖聽黃詔稱觴進白狼
散財竭庫藏拔將出戎行殷絕仁猶在周傾道不忘
來招燕郡內入覲大食傍戎服貂裘紫星輅駿馬蒼
中春辭北望初夏過西涼瀚海洶而湧陰山徬且徨
閑雲迷去路疎雨潤行裝出處空興歎風光自斷腸
典刑陳故事利病上封章天下援涑溺中州冀小康
風俗承喪亂籌策要優長痼疾如神附遊魂笑鬼俚

仁術能骨肉靈藥起膏肓避禍宜緘口當言肯括囊
遭讒心欲剖涉苦膽先嘗北漠絕窮域西隅抵大洋
詩書猶不廢忠信未能忘璫補連腮帳繩穿朽脚牀
郊行長野與人靜若禪房回鶻交游熟崑崙事跡詳
風煙多黯黯雲水兩茫茫災變垂乾象妖氛翳太陽
髯龍三島去玉葉一枝芳明主初登極愚臣敢進狂
九疇從帝錫五事合天常大藥陳金石朝服具冕裳
降升分上下進退有低昂拓境時方急郊天且未遑
應兵無血刃降虜自壺漿按堵無更肆因敵不餽糧
宸心尊德義聖政濟柔剛恩澤函諸夏威稜震八荒
勢連西域重天助北方強舉我陪三省求賢守四方
錦衣捐毳褐肉食弃糟糠隱逸求新仕流亡集故鄉
百官欣戴舜萬國願歸唐耕釣咸生遂工商樂未央
會將封泰岳行看建明堂每歎才雕篆長慙學面牆
君恩予久負賢路我浚妨覆餗恒憂懼持盈是恐惶
故山松徑碧舊隱菊花黃太守方遺舄初平正牧羊
厚顏居此位若已納於惶吟嘯須歸去香山老侍郎
懷古一百韻寄張敏之 耶律楚材

興亡千古事勝負一杯棋感恨空興歎悲吟乃賦詩
三皇崇道德五帝重仁慈禮廢三王謝權興五伯漓

焚書嫌孔孟峻法用高斯政出人思亂身亡國亦隨
阿房修象魏徐福覓靈芝偶語真虛禁長城信謾爲
只知秦失鹿不覺楚亡騅約法三章日恩垂四百期
漢興學校啓文作典章施黷武疲中夏窮兵攘四夷
嗣君恩稍失劉氏德難衰新室雖興難真人已御基
魏吳將奮起靈獻自荒嬉賊子權移漢姦臣鳩築郿
三朝如峙鼎四海若芬絲纔奉山陽主已生司馬師
仲謀服孟德葛亮倍曹丕唯晉成獨統平吳混八維
有初終鮮克居治亂誰思蟬鬢充蘭掖羊車遶竹岐
孫謀無遠慮神器委癡兒國事歸椒室民饑詢肉糜
爲人昧菽麥聞墓問官私衛瓘嘗幾諫何曾已預知
五胡雲擾攘六代電奔馳川谷流腥血郊原厭積屍
天光分耀日地里裂瓜時曆數當歸李驅除暫假隋
西陲開鄯善東鄙討高麗鸞駕如江國龍舟泛汴滌
錦帆遮水面粉浪汚河湄府藏金帛積生靈氣力疲
盜賊天下起章奏禁中欺海內空龍戰河東有鳳姿
元戎展鷹犬頡利助熊羆奉表遵朝命尊王建義旗
經營於盜手禪讓託君辭豪哲歸吾殼要荒入我羈
太宗真令主貞觀有皇規正美開元治俄成天寶悲
曲江還故里林甫領台司裂土封三國纏頭愛八姨

寬裳猶未罷鞀鼓恨來遲逆寇陵丹闕君王捨翠眉
兩京賊黨滅方鎮重權移朱李元堪歎石劉亦可嗤
九州重構亂五代薦荒饑遼宋分南北翁孫講禮儀
宣和風侈靡教主德庸卑背約絕鄰好興師借寇資
懸知喪唇齒何事撤籬籬失地人皆怨蒙塵悔可追
遼家遵漢制孔教祖宣尼煥若文章備康哉政事熙
朝廷嚴袞冕郊廟奏壘篋校獵溫馳射行營習正奇
南州走玉帛諸國畏鞭笞天祚驕人上朝鮮叛海涯
未終三百祀不免一朝危鴨綠金朝起桑乾玉璽遺
後遼興大石西域統龜茲萬里威聲震百年名教垂
武元平宋地殷禮雜宗姬治國崇文事拔賢尚賦詞
邦昌君洛汭劉豫立青淄大定民興詠明昌物適宜
日中須景昃月滿必光虧財腋獨夫難邱墟七廟隳
北朝天輔祐南國俗瘡痍天子潛巡狩宗臣嚴守陴
山西盡荆枳河朔半豺豕食盡謀安出兵羸力不支
長圍重數匝久困再周期太液生秋草姑蘇游野麋
忠臣全節死餘衆入降麾文獻生三子東丹第八枝
虛名如畫餅遺業學爲箕自笑蓬垂鬢誰憐雪滿髭
撫膺長感慨搔首幾嗟咨車蓋知何處衣冠問阿誰
白天明下詔知我素通著發軔裝琴劍登車執策綏

窮廬或白黑驛騎半黃馱肥瘠白如瓠瓊漿甘似飴
天山連北府瀚海通西伊天馬窮渤澥神兵過月氏
感恩承聖勅寄住到尋恩春色多紅樹秋波總綠陂
不須賒酒飲隨分有驢騎吠畝棲禾粟園林足果梨
春粳光燦玉煑飯滑流匙聖祖方輕舉明君應樂推
龍庭陳大禮原廟獻明粢萬國朝金陛千官列玉墀
求賢爲輔弼舉我忝丞疑才德真爲慊顛危不解持
願從麋鹿性豈戀鳳凰池投老誰爲伴黃山有敏之
余作懷古詩百韻非徒作已使世之人知成敗之可
鑑出世之人識興廢之不常也因作偈以見意云歷
代興亡數張紙千年勝負一盤茶因
而識破人間夢始信空門一著奇

本朝

恭和

御製告祭

福陵禮成

高士奇

遙岑開碧甸疊嶂擁珠宮祀典千秋右

巡行二月東迴瞻蒼靄合俯瞰曲流通地是排雲上天因
列柱崇干戈今載戢玉帛舊來同式廓幽岐業長貽
鎬洛功竹馨昭

聖武執鬯展

宸衷兩序陳宏壁諸藩撫大弓壇壝當太乙草樹滿新豐

仰答開基遠勤勞有

睿躬

威遠堡朝

駕恭賦

開原知縣 周志煥

邊庭迎

帝輦朝賀已三更駕羽聯班肅鴻臚引奏清馬嘶青嶂地
人臥綠苔營萬騎隨

鑾輅千官聽漏聲荒屯成壯麗行幄儼都城宣拜

天顏近晨昏瑞露盈懸旌非耀武控馭若觀兵扈從丹衷

切神馳到

玉京

五言絕句

元

婆娑道中

閻長吉

泉源疏地脈田壠上山腰敗石平危徑枯柴補斷橋

明

過錦州

大學士 孫承宗

錦水波初靜高軒向此過似聞城郭是東去竟如何

下香巖

御史 程啓克

危途長側足高處更回頭行路難如此何時卧故邱

題扇上釣魚圖

賀 欽

倚杖看閩山垂綸釣陵水山頭宿霧開水面清風起

自警 二首

賀 欽

戰兢防失足頃刻莫馳心勿謂人誰見當知帝汝臨
為學不謹獨到底是空言猩猩與鸚鵡孤負昊天恩

七言絕句

遼

平州中和館後草亭

李 晏

藤花滿地香仍在松影拂雲寒未收山鳥似嫌遊客
到一聲啼破小亭幽

金

蔡 珪

閭山

西風絕境撫孤松千里川原四望通但怪林梢看鳥
背不知身到碧雲中

明

寄大尹邵文明

賀 欽

長官辭縣賦歸來獨愛幽花手自栽何日一樽同笑
傲東籬飽看帶霜開

本朝

奉使祭告事竣遊閭山清安寺登大士閣 二首

詹事 沈 荃

聞說閭山第一峯蒼崖終古白雲封天風忽起松濤
落下界回看隔幾重

山閣層層架石梁洞門窅窅瀑飛涼攀蘿直上三千
尺鳥語花香白晝長

寧遠溫泉 沈 荃

首山南麓有湯泉煖霧騰空亂曉烟野寺荒原題句
少一泓靈液自涓涓

十三山 錦州知府 孫 成

峩峩天外見芙蓉夜雨新添螺黛重自是閭山行盡

處畫圖雲擁十三峯

秋日望

苗君稷

昭陵 三首

攬轡秋風聽野歌雄圖開闢

太宗多遙知王氣歸遼海不戰中原自倒戈

五雲西向接幽燕八月秋光麗遠天豐鎬三登深雨

露車書萬國靜烽烟

龍蟠翠嶂鬱岩巖路夾蒼松白玉橋十二羽林嚴侍

衛風嘶鐵馬白雲霄

留都春日雜興 御史 郝 浴

三春晴色滿郊垆萬戶明珠下草亭甲騎不鳴山海
外雲消天際柳條青

千山贈剩上人 二首

郝浴

欣聞鳴鳥司鐘鼓更有赤鳥艷海棠人臥千山花氣
裏月升三島水晶旁

雲開窈窕桃花洞雪落霏霏洗耳泉我正不辭千日
酒君來莫帶一分禪

上

陵歌應制

四首

王士禛

兩京相望海雲開馳道如弦候騎催金馬碧雞新奏

捷太平

天子上

陵來

令支回合萬重山閃日旌旗虎豹閒東望風雲過沛

上西來車騎出蕭關

遼水東迴北鎮斜龍蟠虎踞

帝王家依依最是關門柳十二年前拂

翠華

艱難王業本岐豐扶杖來觀父老同

詔賜大酺還給復一時歌舞遍遼東

登玉泉洞

康亮工

花徑幽尋洞口行
綠陰深處兩三鶯
林泉不到紅塵
客留句山中莫問名

盛京通志卷之四十七

盛京通志卷之四十八

雜志

燕丹

丹遣荆軻刺秦王不中秦益發兵伐燕拔薊城燕王喜太子丹等皆率其精兵東保於遼東秦將李信追擊燕王王急用代王嘉計殺太子丹欲獻之秦秦復進兵攻之五歲卒滅燕虜燕王喜

衛滿

漢初以盧縮爲燕王朝鮮王準與燕界於泃水及縮反滅燕人衛滿亡命東渡泃水降準說準求居西界

收中國亡命爲朝鮮藩屏準信之拜爲博士賜以圭
封之百里令守西邊滿誘亡黨稍多乃詐遣人告準
言漢兵十道至求入宿衛遂還攻準準與滿戰不利
走入海居韓地自號韓王滿遂據朝鮮雄於遼東保
塞外爲臣傳子至孫右渠抗命不賓元封三年武帝
以兵伐之朝鮮亦發兵距險樓船將軍楊僕將齊兵
先至戰敗遁走散而復聚右將軍荀彘破其泃水上
軍乃前至平壤城下圍其西北楊僕亦往會居城南
數月未下彘所將燕代卒多勁悍力戰僕因敗亡嘗
持和節朝鮮大臣陰使人約降於僕往來未決彘使
人降之不從又數與僕期戰僕欲就其約不會彘意
僕前失軍今與朝鮮私善疑有反計未敢發武帝以
兩將乖異兵久不決使濟南太守公孫遂正之許便
宜從事彘乃以意告遂執僕並其軍遂還報武帝誅
遂彘擊朝鮮益急朝鮮人殺其王右渠以降武帝以
其地爲樂浪臨屯元菟真番四郡徵彘棄市僕贖爲
庶人

臨屯郡治東曉去長安六千一百三十八里十
五縣真番郡治善縣去長安七千六百四十里

王遼東

公孫度父名延避吏居元菟時元菟太守公孫域子

豹年十八早死度少時名豹又與玳子同年玳見而親愛之遣就師學爲取妻後舉有道除尚書郎稍遷冀州刺史以謠言免同郡徐榮爲董卓中郎將薦度爲遼東太守東擊高句驪西攻烏桓威行海畔初平元年乃分遼東爲遼西中遼郡並置太守自立爲遼東侯平州牧追封父延爲建義侯立漢二祖廟承制設壇墠於襄平城南郊祀天地藉田理兵乘鸞輅九旒建安九年司空曹操表度爲奮威將軍封永寧鄉侯度曰我王遼東何永寧也藏印綬武庫

取尚

袁熙袁尚奔烏桓曹操征遼西熙尚與烏桓逆操軍戰敗乃奔遼東公孫康尚先與熙謀曰先到遼東康必見我我獨爲兄手擊之且據其郡猶可以自廣也康心亦規取尚以爲功乃先置精勇於廐中然後請尚熙疑不欲進尚彊之遂與俱入爲伏兵所禽坐於凍地尚謂康曰寒不可忍可相與席康曰卿頭顱方行萬里何席之爲遂斬首送於操

席障

晉太康四年涉歸卒弟耐纂立將謀殺慕容廆時廆年十五出避難追者急乃走匿於遼東徐郁家入其

屋以席自障追者入屋發視竟無所見太康五年國人殺耐迎鹿立之

赭白馬

慕容廆初有赭白馬常自乘之既爲石虎所圖力弱分將危陷棄衆將逃以此馬奔而韉之馬見鞍轡蹄齧不得近乃止俄而鄴使至石虎國有難廆旋歸至雋壽光元年馬四十九歲矣而駿逸不衰雋奇之比鮑氏驄命鑄銅以圖其象親爲銘贊鑄頌其傍象成而馬死

韓恒見夢

韓恒初無傳見夢於崔鴻故遂記之

信馮君

北燕王馮弘立與宋通好魏延和元年太武親討之弘嬰城固守其營邱遼東成周樂浪帶方元菟皆降弘子崇亦降太武封崇爲遼西王錄其國尙書事遼西十郡承制假授文官尙書刺史武官征虜以下弘遣其將封羽率衆圍崇太武詔永昌王健救之封羽又以九城降弘爲魏所逼奔於高麗至高麗遣使勞之曰龍城王馮君爰適野次士馬勞乎弘慙怒稱制答讓之高麗乃處之於平郭尋徙北豐弘素侮

高麗政刑賞罰猶如其國高麗乃奪其侍人質任王
仁弘忿怨之謀將南奔太武又徵弘於高麗乃殺之
於北豐子孫同時死者十餘人

天門開

齊高洋嘗從文襄行過遼陽山獨見天門開餘人無
見者及卽位十年正幸遼陽甘露寺禪居深觀唯軍
國大事乃奏聞三月始還都

六合城

何稠字桂林性絕巧遼東之役攝右屯衛將軍時工
部尙書宇文愷造遼水橋不成師不得濟麥鐵杖因
而遇害帝遣稠造橋三日而就初稠制行殿及六合
城至是帝於遼左與賊相對夜中施之其城週圍八
里城及女垣合高十仞上布甲士立仗建旗四隅置
闕面別一觀觀下三門遲明而畢高麗望見謂若神
功

朱蒙

夫餘王嘗得河伯女因閉於室內爲日所照引身避
之日影又逐旣而有孕生一卵大如五升夫餘棄之
與犬豕皆不食棄於路牛馬避之棄於野衆鳥以毛
茹之王剖之不能破遂還其母母以物裹置煖處有

一男破殼而出及長字之曰朱蒙其俗言朱蒙者善射也國王命之養馬朱蒙減駿馬食令瘦善養駑馬令肥王以肥者自乘以瘦者予朱蒙後狩於田以朱蒙善射限之一矢朱蒙雖矢少殪獸甚多夫餘之臣屢欲殺之其母以告朱蒙朱蒙乃與烏引烏違二人東南走至淹滯水欲濟無梁夫餘人追之甚急朱蒙告水曰我是日子河伯外孫今追兵垂及如何得濟於是魚鱉並浮爲橋朱蒙旣渡魚鱉乃解追騎阻水不及朱蒙遂至普述水遇三人一著麻衣一著衲衣一著水藻衣與朱蒙至紇升骨城遂居王夫餘其後支別爲高句麗因以高爲氏至曾孫莫來乃併扶餘唐太宗伐高麗時遼東城有朱蒙祠鎖甲銛矛妄言前燕世天所降方唐兵圍急飾美女以婦神巫言朱蒙悅城必完及勦攻之急城遂潰巫言不驗

用心過苦

李廣字弘基本遼東人後徙范陽博涉羣書少與趙郡李謩齊名爲邢魏之亞以才學兼侍御史修國史南臺文奏多其辭也齊文宣初嗣霸業命掌書記天保初欲以爲中書郎遇其病篤乃止廣嘗欲早朝假寐忽驚謂其妻曰吾向似睡非睡忽見一人出吾身

中語云君用心過苦非精神所堪今辭君去數日便
遇疾積年不起遂卒所薦士畢義雲集其文集七卷
托魏收爲之序

大鳥

隋大業八年煬帝征遼兵分二十四道鑿方長岑海
冥蓋馬建安南蘇遼東元菟扶餘朝鮮沃沮樂浪爲
左軍黏蟬含資渾彌臨屯侯城提奚踏肅石碣東瞻
帶方襄平爲右軍三月車駕度遼大戰於東岸破之
甲午進圍遼東乙未舍臨海頓見二大鳥高丈餘竊
身朱足游泳自如煬帝異之命工圖寫詔虞綽爲銘
覽而善之命勒海上

諭遼東城

閻毗榆林盛樂人遼東之役以右翊衛長史領武賁
郎將典宿衛時衆軍圍遼東城帝令毗詣城下宣諭
賊弓弩亂發所乘馬中流矢毗顏色不變辭氣抑揚
卒事而去

渤錯水

唐太宗征高麗拔遼蓋二州之人以歸兵過城下酋
長登城再拜帝嘉其能守賜絹百匹帝至渤錯水阻
淖八十里長孫無忌楊師道等萬人斬樵築道聯車

爲梁帝負薪馬上助役十月兵畢度

離合詩

元萬頃從李勣征高麗管書記勣命別將郭待封以舟師赴平壤馮師本載糧繼之不及期欲謀勣而恐爲謀所得萬頃爲作離合詩遺勣勣怒曰軍機切遽何用詩爲欲斬待封萬頃言狀乃免又使萬頃草檄讓高麗而譏其不知守鴨綠之險莫離支報曰謹聞命徙兵固守軍不得入高宗聞之投萬頃嶺外

高麗秘記

高麗時蓋蘇文死子男生嗣帝遣李勣薛仁貴等討之時侍御史賈言忠自軍中計事還帝問狀對曰必克諺云軍無媒中道回今男生兄弟鬪狠爲我嚮道敵之情僞我盡知之故必克且高麗秘記不及九百年當有八十大將滅之高氏自漢有國今九百年而李勣年八十是行不再舉矣未幾李勣果滅高麗收其城七十有六

知蛇語

遼宗室神速姑能知蛇語太祖從兄鐸骨扎以本帳下蛇鳴命神速姑解之知蛇謂穴旁得金以爲帶名

龍錫金

金史通志 卷之四十八
渡混同江

金主攻黃龍府次混同江無舟以渡金主使一人導前乘赭白馬徑涉曰視吾鞭所指而行諸軍隨之以濟遂克黃龍府

立木刻詩

遼耶律倍太祖長子太祖薨倍知皇太后意欲立德光乃與羣臣請於太后而讓位焉太宗既立有疑倍意倍謂左右曰我以天下讓主上今反見疑不如適他國以成吳太伯之名立木海上刻詩曰小山壓大山大山全無力羞見故鄉人從此投外國携高美人

載書浮海去之唐倍初市書至萬卷藏於醫巫閭絕頂之望海堂通陰陽知音律精醫藥砭熨之術工遼漢文章嘗譯陰符經善畫本國人物如射騎獵雪騎千鹿圖皆入宋秘府

八營

天慶五年置怨軍八營募自宜州者曰前宜後宜自錦自乾自顯者如之又有乾顯大營岩州營凡二萬八千餘人一角指天一角指地

金初國俗有被殺者其親族繫刃杖端與衆至其家

使巫歌而祝之曰取爾一角指天一角指地之牛無名之馬向之則華面背之則白尾橫視之則有左右翼者其聲哀切悽婉若蒿里之音既而以刃畫地取畜產財物而還其家一經詛祝家道輒敗
神巫

金昭祖久無子有巫者能道神語甚驗乃往禱焉巫良久曰男子之魂至矣此子厚有福德子孫昌盛可拜受之生則名之曰烏古迺是爲景祖又良久曰女子之魂至矣可名曰五鷗忍又良久曰女子之兆復見可名曰幹都拔又良久曰男子之兆復見然性不馴良長則殘忍無親親之恩必行非義不可受也昭祖方念後嗣未立乃曰雖不良亦願受之巫者曰當名之曰烏古出旣而生二男二女其次第先後皆如巫者之言

秃耳馬

金景祖有黃馬服乘如意景祖沒遼貴人爭欲得之世祖弗與曰難未息也馬不可以與人遂割其兩耳謂之秃耳馬

世祖前知

金世祖旣破窩謀罕師還疾篤元娶孛懶氏哭不止

世祖曰汝勿哭汝惟後我一歲耳肅宗請後事曰汝
惟後我三年肅宗出謂人曰吾兄至此亦不與我好
言乃叩地而哭俄呼穆宗謂曰烏雅朶柔善若辦集
契丹事阿骨打能之遼大安八年卒年五十四明年
孛懶氏卒又明年肅宗卒肅宗疾篤嘆曰吾兄真多
知哉

百二十歲

大定二十五年世宗幸上京召見百二十歲老人賜
帛

寶珠黃衣

金顯宗孝懿皇后徒單氏以皇統七年生於遼陽母
夢神人授以寶珠光焰滿室既寤而生紅光燭庭世
宗備禮納爲太子妃生章宗昭聖皇后劉氏遼陽人
天眷二年九月己亥夜后家若見有黃衣女子入其
母室中者俄頃后生性聰慧讀書過目不忘世宗選
入東宮生宣宗

得裘獻馬

至元二十四年春二月或告乃顏反詔伯顏覘之乃
多載衣裘入其境輒以與驛人既至乃顏爲設宴謀
執之伯顏覺與從者趨出分三道逸去驛人以得衣

五京通志 卷之四十八
二
襄故爭獻健馬遂得脫馳還白狀

關先生

元至十八年宋關先生破頭潘等破上都轉掠遼陽至高麗二十三年復攻上都孛羅鐵木兒擊降之莘城隍

明建文四年小河之戰斬燕將陳文王真自刎燕王見失兩將方自督戰平安操長鎗幾及之馬蹶不得前燕番將王騏躍馬入陣援去先是王嘗夢與平安戰敗見一男子豐貌美髯乘白馬提大刀自西來大呼救駕欲安馬應聲而倒王得脫問其姓名曰莘城隍也至是果符所夢

盛京通志卷之四十八

盛京通志

卷之四十八

雜志

七

袁崇煥所害年五十四與韓信之年相倍

旱孤椿

俗傳打孤椿者謂天旱是墓中新死人作怪所致掘墓碎之則雨成化間醫巫閻先生賀欽言於當道禁其事後數年王備禦始至適天旱村民來告欲踵故俗王許之先生急投一簡論其妄且干國典王遂悔而急止之已而天雨訛言亦息後有彭姓者專以此惑衆先生言之王參戎杖其人火其書

濟小塘

明季人善吞刀吐火各戲術至今相傳以爲仙則附

會也

龍王晚渡

遼陽東門外太子河岸舊有龍王廟相傳夜間常有老翁操舟濟人並不取利月中有見其狀貌者頗與龍神相似故龍王晚渡爲遼陽八景之一

東京古墓

寧古塔有古墓在金上京界內至國朝忽陷地宮中多殉葬之物考金史金太祖初葬於海古城西卽今之寧古塔也其後王公貴人多葬其地惜誌銘無可辨耳

百二十餘歲

東莪貝勒壽一百二十餘歲爲貝勒八十年

役鬼

雍道常得妖書能驅役鬼神凡諸戲幻之術不可思議卒爲鬼所厄洪道亦能役鬼常見一旋風戲以法定之本欲卽解因醉失誤遂爲冥司所攝答之數十臂肉腐黑以至於死

轉身計

正黃旗驍騎校金光前起身戎伍目不識字然見善必爲訓戒兵丁不妄殺人不淫一婦不擄一物不燒

一房妻龔氏識字誦經順治癸巳冬隨征福建道出
武林聞具德和尚說法自此有得辛丑夏還駐節錢
塘光前有疾龔爲延醫光前止之曰我共與汝親叩
靈隱今正欲作轉身之計求和尚證明耳何以藥爲
龔笑曰不意君亦到此地位命造二棺曰當與金公
偕行稍遲爲公畢後事耳金合掌而逝龔於後十四
日亦端坐而化

起楹柱

瀋陽姚崇廣最有力嘗有人憇廟簷間崇廣暗扶楹
柱起壓其人衣裾於下巴而復爲出之遂以力聞然
終身不與人鬪有鬪者以力止之皆讐服莫敢支吾
夫有勇力而不鬪狠又能服鬪者使之不鬪其人雖
微固可傳也

三城洞

溝兒湯東三城子有一山洞洞口時有行跡未嘗見
人出入好事者常探之初窮一洞見一小沙河褰裳
涉之復遇一洞遙與前洞相屬而洞口甚窄側身入
中頗黑暗及聞水聲潺湲復開朗前阻一河徘徊
欲渡忽得小舟將操之過岸而舟繫鐵索一頭沉水
引之甚長河風漸覺刺骨又念來時已久遂尋故徑

而歸自此之後洞口亦無人跡

鐵叉山

奉天城東南有九頂鐵叉山相傳爲仙靈窟宅三教堂郭道常於山中苦修數年時奉天大旱禱雨無驗使郭道祈請起壇而雨當事者多敬重之延住三教堂自此世味已交回首靈山不可復入矣

雨雹

兵部郎中常某之僕嘗於夢中爲人促去至一官署儀衛甚嚴主者呼之入與一囊命之曰汝將此囊中物散布某屯若干某堡若干勿得多寡任意又與一

大羊爲坐騎復戒之曰手寒則於羊身頸拭之僕既出騎羊背耳中但聞風聲凡所經歷之處取囊中物如主者言散布焉頗覺入手甚寒終不知爲何物也既甦聞某屯某堡皆下冰雹方悟而手已凍壞蓋僕性強忍頻拭羊身之戒未之聽也

狐婦

鑲紅旗佐領達基之父某獵於山中見一麗婦言迷失路欲求携歸母家某心計深山中何得有婦人必妖狐也嘗聞人血禁狐可使不得變化欲驗其術遂呼共乘因暗破鼻出血塗婦面婦果不能去至家遂

爲夫妻生達基其家並不諱其事達基曾向人言予母常戴毡帽不肯露頂蓋頂心空洞歷歷可見五臟也

顛僧

廣寧向有僧頗顛常與羣兒戲或畫兒掌中使拳之放拳則雷聲殷然兒輩往往乞雷以爲笑樂又能煮石爲糧或與羣兒食之以爲味如芋也善醫請療者身到即愈後一難產家延之僧不肯行強之至門而婦遂產僧頂暴裂濃血不止每悵然曰吾行已壞真冤孽也從此不復至人家來就醫者或以濃血塗之

往往而愈後不知所終

割股

寧古塔監生歐某家有妖狐爲患有善治者燻死數狐老狐益引黨類作祟已魅殺臧獲十餘人復聲言將殺歐某之母旋致危殆歐某割股以進俄聞狐語曰此人割股孝親天已增其母壽十年矣遂去不復爲患後十年而母卒

歪嘴雀

康熙五十年間羅雀者多得之形如阿藍色微黑上嘴直而下嘴曲後亦不見

寶刀

雍正九年三哈刺蘇刺章京那莫善得一古刀光澤異常有若水珠一顆隨刀上下以手拭之全無痕跡無骨魚

雍正十三年四月遼河得一魚重三百六十觔無鱗刺惟背上有若骨者一行共數十片煉其油色赤不知何名



